

Kapiya Sën Paulus Kevu Vu Kerisi-yi-alam Vu Epesus

1 ¹ Sa Paulus sën Anutu ggooin sa raḅ in bë sa natu Kerisi yi sinarë. Sa kevu kapiya sënë yök vu Anutu-yi-alam ham sën ham ayomin neya timu vu Kerisi menepiik vu lo. ² Hil Amad Anutu luho Mehöböp Yesu Kerisi degevonḡ semusën vu ham beham ayomin ḡep revuh.

Anutu Vo Semusën Pin Vu Hil Raḅ Kerisi

³ Hil ḡaḅo hil Mehöböp Yesu Kerisi Ama Anutu arë jaḅ in vonḡ Kerisi yam, lom ḅo yaḡek yi semusën nivesa vesa pin sën neloḅ vu hil anod lo yam vu hil. ⁴ Yönon, yö ggooin hil raḅ wirek gesën su tunḡ yaḡek los dob rë geyö nahën lo. Ahë neving hil beggoin hil raḅ betato hil bë hil natu Yesu yi alam gehil natu mehönon nid röpsën, gesu gelë nabë nḡaa nipaya ḡep vu hil. ⁵ Geyö kwa vo wirek ving bë rëḅ semu hil nabë sënë, lom nër vorot bë Yesu Kerisi rëḅ ḡeḅo hil nah vu yi lom mëm nanër hil nabë nalu hil. ⁶ Hil su nehevong nḡaa nivesa ti in bë mëm gevong nabë saga doḅ nah vu hil rë, ḡaḅ ahë neving Nalu Yesu om sën nevonḡ vu hil nyëmasën, om hil ḡaḅo arë jaḅ na vavunë rot.

⁷ Log Nalu sagi keseh niḅöḅ ya in bë kevoh hil nḡaa nipaya na gesu ḡep vu hil, log mëm ḡeḅo hil nah vu Anutu. ⁸ Lob nevonḡ yi semusën sënë böpata rot vu hil gesu neggulin rë. Genevo kwa los netateḅin ḡaḡek degwa vu hil ving. ⁹ Tateḅin ḡaḡek sën kwa nevo wirek beyö negḡep vunsën vu yi lo vu hil. ¹⁰ Nebë, buk govek na rë, loḅ mëm Kerisi natu ala bengupin nḡaa pin jevuh ti bedegevek babu. Nḡaa pin vu yaḡek genḡaa pin vu dob.

¹¹ Lob Anutu nevonḡ nḡaa pin banon neraḅ neyoh vu yö kwa, om kwa vo wirek benër vorot bë Kerisi rëḅ ḡeḅo hil nom behil natu yi alam. ¹² Ggooin he alam Yuda raḅ wirek loḅ sën Nalu yö nahën gesu yam dob rë lo, in bë he kwamin bo Kerisi meḡeḡin yi. Lob saga neḅo Anutu arë raḅ benetato niwëëk rangah vu mehönon. ¹³ Loḅ mëm gwëbeng sënë ham alam-yu-ngwë nenḡo ḡaḡek anon ving beham hurek babu. ḡaḡek anon sënë nebë Bengö Nivesa sën tateḅin vu ham nebë Anutu ro aggata in bë

geko ham nah vu yi lo. Ham vong ving ggovek, loḵ mēm Anutu vong Anon Vabuung yam beloḵ ya nedo ham ayomin yoh vu sēn nēr vorot lo, in bē tato nabē yi alam ham. ¹⁴Lob Anon Vabuung saga netato rangah bē Anutu baḡo hil tu yi alam ggovek ya. Geyō rēḵ medo tato nabē sēnē in geko Anutu arē los niwēēk jaḵ. Rot bena berup doḵ buk sēn anon jaḵ baAnutu geko hil nah medo geving yi lo.

Paulus Jom Raḵ Bē Anutu Bo Kwa Vu Alam Epesus

¹⁵Nebē saga lom sa hanḡo bē ham ayomin neya timu vu Mehōbōp Yesu geham ahēmin neving yi alam. ¹⁶Lom sa ahēḡ nivesa rot vu Anutu in ham buk gerangah, mesa medo najom raḵ in ham gesa su nehevuū rē. ¹⁷Sa medo najom raḵ nebē hil Mehōbōp Yesu Kerisi yi Anutu sēn Ama los niwēēk lo gevong beham natu alam los kwamin beham jaḵ ḡaḡek los degwa ni beham jaḵ Kerisi ni nivesa.

¹⁸Lob sa najom raḵ ving bē gevong beyi ḡaḡek ḡēp rangah vu ham beham jaḵ ni, gemēm ham jaḵ ni geving nabē ham nevo kwamin in yi menedo. In ggooin ham raḵ in bē ham natu yi alam bemedo geving yi ḡēp yaḡek. Log vongin bē gevong yi nḡaa nivesa los arē arē nḡahiseḵē rot vu ham. ¹⁹Log sa bē ham jaḵ ni nabē Anutu niwēēk bōpata rot kesuu nḡaa vahi pin, log nevonḡ niwēēk saga vu hil ving behil ayod neya timu vu yi. Nebē sēn vonḡ nḡaa niwēēk bōpata ²⁰sēn ḵo Kerisi vēr in alam-diiḵsēn bevesa loḵ yah, betunḡ yi ya nedo nema vesa ḡḡēp yaḡek lo. ²¹Lob tu ala mekesuu alam bōp los ggev gengaa los arēj, gengaa niwēēk pin sēn denedo yaḡek babu lo. Yōnon, kesuu nḡaa pin sēn arēj negḡēp vu dob agi, gesēn arēj rēḵ berup ḡēp Buk-tamusēn lo. ²²Log Anutu tunḡ nḡaa pin loḵ ya nema ggovek ya bevong tu Kerisi-yi-alam pin hir yuseḵē in nḡaa pin ala yi. ²³Lom vong bē Kerisi-yi-alam pin detu Kerisi navi, lob Kerisi sēn nedo loḵ nḡaa pin vu yaḡek los dob lo nedo loḵ yi alam pin ti ti ving benero sir yoh vu kwa.

Hil Bē Rēḵ Malad Nama Rēḵ Kerisi Luḵ Yam In Hil

2 ¹Lob wirek ham bē rēḵ malamin nama na verōḵ yi in ham nekweyēh ḡaḡek los nevonḡ nḡaa nipaya. ²In ham nesepa loḵ aggata-dob-yi. Ham nevonḡ nḡaa nipaya geham nengamin yes vu memō nipaya hir ala Satan sēn tu ala menēgin nḡaa pin sēn negḡēp yaḡek babu los dob lo. Gememō sēnē yō nahēn nevonḡ huk loḵ alam sēn su nengaj yes vu Anutu rē lo ayoj. ³Wirek og hil naha raḵ sir gehil medo nesepa loḵ nḡaa sēn hil ahēd neving lo menehevong. Hil nḡo nesepa loḵ nḡaa los ayo nevu nevu sēn hil kwad nevo los hil malad anonin lo, gehil su kwad nelah loḵ rē. Lob Anutu ahē sengēn vu hil rot wirek bevongin bē kevoh hil na. Nebē sēn nahēn ahē sengēn vu alam vahi bevongin kevoh sir na agi, in nahēn denesepa loḵ nḡaa nebē sagi. ⁴Rēḵ mu Anutu mehō

kwa vonginsën degwa lob kwa pesivin hil pangsën rot. ⁵In hil ngaa nipaya tato bē hil rēḵ malad nama, rēḵ ma gAnutu vong behil atu mewis nebē sën vong beKerisi vesa loḵ yah bekedī raḵ yah vu bedub lo. Ḷo hil yah vu yi nyēmasën, gaḵ su vong loḵ yah hil ngaa nivesa ti rē. ⁶Hil atu Yesu-yi-alam lom Anutu ḵo hil raḵ ving yi benēr vorot bē hil rēḵ medo doḵ ti gēp yaḡek. ⁷Nevong nebē saga in bē alam degelē degwata los degwata vu Buk-tamusën nabē Anutu mehō semusën degwa yōnon rot, in nevong ngaa nivesa saga vu hil degwa raḵ Kerisi Yesu. ⁸Ham su yoh vu bē gwevong ngaa ti doḵ nah in gweḵo ham vēr in ham nipaya nyēvewen rē. Gaḵ mu Anutu semu ham raḵ sën ham ayomin neya timu vu Yesu lo, bevong ham vēr nyēmasën. ⁹Degwa su neggēp vu ngaa nivesa sën ham nevong lo in bē ham rēḵ gweḵo arēmin jaḵ rē. ¹⁰In Anutu nesemu hil yoh vu yō kwa. Nevong behil atu Kerisi-yi-alam in bē hil ḡevong huk nivesa vesa sën kwa vo wirek benēr vorot bē hil ḡevong lo.

Kerisi Supin Alam Yu Luu Detu Yu Timu

¹¹Om ham su kwamin birek in sēnē: Wirek ham navimin tato ham nebē ham alam-yu-ngwē. Log alam sën denerah* navij lo denenēr ham bē ‘alam sën su denerah* navij rē’ lo. ¹²Og vu buk saga ham su nevo kwamin in Kerisi rē, gaḵ alam Israel denelē bē ham alam-yu-ngwē, log ḡaḡek sën Anutu joo raḵ sir lo, og su joo raḵ ham ving rē. Log ham su nevo kwamin in ngaa nivesa ti meneḡin nebē alam Israel rē, gAnutu soḡek su nedo ving ham in bē doḵ vu ham rē. ¹³Rēḵ mu mēm gwēbeng sēnē og ham sën nedo adingnē wirek lo yam dus vu he Israel, in Kerisi keseh niḵōḵ in ham. ¹⁴In netu hil mehō-mamer-yi in bē hil medo jevuh ti, lob supin he alam Yuda ving ham alam-yu-ngwē yam. Log kevoh ḵatum sën neruu hil lo ya gesupin hil behil atu alam degwa timu. ¹⁵In degwa nebē vasap navi bediik mekevoh ḡaḡek sën nevong behil nehalē hil paya lo ya. Ḡaḡek sën kevoh ya-ē, og yiḵ Horek sën nedēginengin ḡaḡek ngahiseḵē raḵ he menenēr in ngaa vahi vu he ving lo. Log nevong nebē sagi in bē he Yuda geham alam-yu-ngwē behil natu yō yi alam mewis degwa timu bemedo jevuh ti. ¹⁶Yōnon, diiḵ raḵ ḵelepeḵo* in bē gevong behil natu anon timu beḡaḡek sën neggēp vu hil lo nadiiḵ na, loḵ mēm geḵo hil pin doḵ ti nah vu Anutu. ¹⁷Om sën ḵo Bengō Nivesa mamer-yi beyam nēr. Vong mamer vu ham sën nedo adingnē lo, gevu he sën nado dus lo ving. ¹⁸Yōnon, Yesu vong behil yu luu ayam loḵ ti vu Ama, gevong Anon Vabuung yam tateḵin aggata vu hil.

Hil Sën Kerisi-yi-alam Lo Og Hil Atu Anutu Yi Dub Soḡek

¹⁹Nebē saga om gwēbeng sēnē ham su nebē alam-yu-ngwē los alam nenga nenga rē. Gaḵ ham tu Kerisi-yi-alam geyi nyēḡ tu ham nyēḡ, geham nebē alam sën denedo loḵ Anutu yi begganḡ ving yi. ²⁰Log

ham nebë begganğ sën Anutu lev, gemudeng sën ham nare rağ nebë alam sinarë nyëdahis losho alam-denenër-ğagek-rangahsën. GeYesu tu degwasekë nebë gelong niwëek sën begganğ nyëketu yi. ²¹Lob ğadu begganğ sekë pin ahon bebbegganğ anon pin köpek, lob begganğ saga tu dub vabuung yonon betu Mehöböp yi nğaa. ²²Log Kerisi-yi-alam ham, lob ham nebë begganğ sekë sën delev begganğ rağ beham tu Anutu yi dub in Anon Vabuung doğ medo.

Paulus Yi Huk Bë Nanër Bengö Nivesa Vu Alam-yu-ngwë

3 ¹Nebë saga, om sën sa Paulus seya nado qarabus in sën senër Yesu Kerisi rangah vu ham alam-yu-ngwë lo. ²Mağ ham nğo ggovek bë Anutu vo ğagek semusën sën vongin bë nanër vu ham lo vu sa in bë sa ğako nök vu ham. ³Log yik tato ğagek sën neggëp vunsën wirek lo rangah vu sa, yoh vu ğagek dus sën sa kevü yök vu ham wirek lo. ⁴Om nabë ham natevin, og ham yoh vu bë jağ ni nabë serağ Kerisi yi ğagek sën neggëp vunsën wirek lo ni. ⁵Anutu su tatekin ğagek sënë vu alam sën denedo dob wirek lo ti berak ni rë. Gağ gwëbeng og Anon Vabuung tatekin vu Anutu yi sinarë los yi alam-denenër-ğagek-rangahsën mederağ ni. ⁶Log ğagek sënë nër bë Yesu Kerisi vonğ Bengö Nivesa yam in bë ham alam-yu-ngwë doğ nam geving he alam Yuda behil natu alam degwa timu. Lob ğagek sën Anutu joo wirek bë gevong vu he lo, og vonğ vu ham ving.

⁷Lob Anutu vonğ semusën vu sa nyëmasën rağ yö yi niwëek, gevong besetu yi hur in bë sa nanër Bengö Nivesa sënë rangah. ⁸Gağ sa mehö niğ paya gAnutu-yi-alam pin nijvesa kesuu sa. Rëğ vonğ semusën anon saga loğ yam sa nemağ nyëmasën, in bë sa nanër Kerisi yi nğaa anon nivesa sën nevong in bë doğ vu alam-yu-ngwë lo rangah vu sir. ⁹Log sa tatekin vu mehönon pin nabë Anutu vonğ ğagek sën neggëp kesii wirek lo töğ yam rangah banon rağ nebë sënë. In ğagek sagi yö neggëp kesii loğ Anutu ayo vu buk sën tung dob lo rot begwëbeng. ¹⁰Neggëp kesii wirek in bë nğaahur hir ggev los nğaahur nij wëek vu yağek babu degelë Kerisi-yi-alam gwëbeng sagi medejağ ni nabë Anutu mehö kwa böp kesuu sir pin. ¹¹In yö kwa vo nyëdahis meneggëp loğ ayo vorot bë hil Mehöböp Kerisi Yesu rëğ gevong nğaa sënë banon jağ. ¹²Hil ayod neya timu vu Yesu om sën hil su nahöneng in Anutu mala rë, gağ hil naha rağ yi los najom rağ ya vu yi nebë sën hil atu yi alam niröp lo. ¹³Om sën sa bë nanër vu ham nabë ham su newamin jağ geseğëmin nama in nğaa maggin sën nedëginengin sa lo rë. Gağ mu ham napisek in nğaa saga töğ vu sa, in netöğ vu sa rağ degwa sën sa nehağo Bengö Nivesa yök vu ham lo.

Paulus Vongin Bë Alam Epesus Dejağ Ni Nabë Kerisi Ahë Neving Sir

¹⁴Om sën sa najom rağ in ham pangsën geneketağ vu hil Mehöböp Yesu Kerisi Ama Anutu bë doğ vu ham. ¹⁵In alam yağek-yi los dob-yi

pin degwaj yi. ¹⁶Sa najom raḵ vu yi nebë: Ngaanon los niwëëk nivesa pin neggëp vu yi, om gevong Anon Vabuung nök vu ham in bo gadu doḵ ham ayomin beham bare niwëëk. ¹⁷Gesa najom raḵ nebë: Ham ayomin na timu vu Kerisi, lom mëm yö rëḵ medo doḵ ham ayomin. Lob ham jaḵ ni nabë Anutu ahë neving ham rot, bemëm ham bare niwëëk jaḵ degwa saga, nabë sën kele gëga neluḵ ya dob benare niwëëk. ¹⁸Bemëm ham los Anutu-yi-alam pin rëḵ jaḵ ni nabë Anutu ahë neving hil pangsen raḵ buk pin kesuu ngaa vahi pin, gesu mala nenga in hil ma ni nelëlin hil rë. ¹⁹Gesa najom raḵ bë ham jaḵ ni nabë Kerisi ahë neving hil rot kesuu ngaa pin sën hil mehönnon naraḵ ni lo. Om mëm Anutu rëḵ doḵ medo ham ayomin begevong beham nabë yi, gengaa nipaya ti su gëp vu ham. Gaḵ ham gwevong ngaa pin nabë sën Anutu nevong lo.

²⁰Log hil gaḵo Anutu arë jaḵ, in yö yoh vu bë gevong ngaa böp böp vu hil kesuu ngaa pin sën hil ayoh vu bë ketaḵ in los kwad bo lo. Nevong ngaa nebë saga raḵ yö niwëëk sën nevong huk loḵ hil ayod lo. ²¹Nebë saga om hil sën Kerisi-yi-alam hil lo, og hil los Kerisi Yesu ngo medo gaḵo Anutu arë jaḵ noh vu buk pin degwata los degwata. Yönon.

Hil Sën Kerisi-Yi-Alam Hil Lo Atu Kerisi Anon

4 ¹Sa nado qarabus in Mehöböp yi mehö sa. Om sa bë nanër vu ham nabë Anutu ggooin ham raḵ, om ham gwevong ngaa pin nivesa noh vu sën kwa nevo bë yi alam degevong lo. ²Ham su gweḵo ham jaḵ, gaḵ ham malamin yes beham nahubin ham, geham najom ham ahon geham su bo doḵ ngaa nipaya sën ham vahi denevong vu ham lo, gaḵ ham ahëmin geving ham. ³Ham nimin wëëk in ham su basuh ham, gaḵ ham medo jevuh ti nabë sën Anon Vabuung ahë neving bë ham gwevong lo. In nabë ham gwelë ham nivesa bemedo jevuh ti, og saga rëḵ naduu ham ahon beham natu degwa timu. ⁴In yiḵ hil atu anon timu, geyiḵ Anon Vabuung timu nedo, log ham bo kwamin in sën Anutu ggooin ham raḵ lo. ⁵Kë! Yiḵ hil Mehöböp timu nedo, gehil nehevong ving ggëp ti, gehil naripek bël ggëp ti. ⁶Log yiḵ hil Anutu timu nedo. Hil pin Amad yi, genetu hil pin alad, genevong behil pin nehevong yi huk, genedo loḵ hil pin ayod. ⁷Rëḵ Kerisi vo yi semusen ti ti ggelek hil pin, behil haḵo nyëmasën yoh vu yö kwa.

⁸Yoh vu sën dekevu meneggëp loḵ Anutu-yi-ḵapiya lo nebë:

“Kesuu alam sën denesis begö vu yi lo
beduu sir ahon,

log mëm raḵ yah vavunë

bevo semusen ggelek mehönnon nyëmasën.”

⁹Rëḵ gaḵek sën nër agi bë raḵ yah vavunë om saga maḵ tato bë luḵ yam dob sën neggëp gebinë agi muḡin. ¹⁰Gaḵ mehö sën luḵ yam lo, yiḵ mehö sën raḵ yah vavunë mekesuu yaḡek teb pin lo, lob raḵ yah vavunë in bë natu ala megeḡin ngaa pin.

¹¹Log vo semusën aggagga vu yi alam nebë sënë: Vahi denetu sinarë, gevahi denetu alam-denenër-ğägek-rangahsën, gevahi deneko loğ nyëğ medenenër Bengö Nivesa vu alam dahis. Vahi denegin Kerisi-yi-alam gevahi denetu tatovaha. ¹²Nevonğ yi semusën ggelek nebë sënë in bë Anutu-yi-alam pin denatu anon timu medegevonğ yi huk mededoğ vu sir, geKerisi-yi-alam ngahijsekë jağ bedebare nijwëk. ¹³Rot behil pin gevonğ geving gağek gëp ti, gehil pin ajağ Anutu nalu ni, lob mëm hil natu mehönon yohvu nabë Kerisi sën mehö yohvu geniröp los dahis lo. ¹⁴Rëğ mu hil su medo gevonğ ngöğ ngöğ nabë hurmahen. Bë hil gevonğ nabë saga, og mehönon pin hir gağek sën kwaj nevo medenenër lo rëğ geğo hil nah menom nabë sën sang neko kele nema los ris. Mehönon kuungsën rëğ dekepë hil galam nijpaya los kwaj rëğ detetuhin hil. ¹⁵Rëğ mu nabë hil ahëd geving hil benanër gağek anon mu, og hil rëğ nabë Kerisi behil gevonğ ngaa pin nabë sën nevonğ lo, geyö rëğ natu yusekë begegin hil pin. ¹⁶Saga nebë sën yusekë nesupin mehöti ni len ti ti pin in bë semu anon jağ. Gehil pin ti ti nebë telitek meneloğ vu anon bevo niwëk vu navi. Gelen ti ti nevonğ huk agga ti ti yoh vu sir. Gemëm ahëj neving sir mesir böp nerağ loğ ti medenare niwëk medenetu anon timu.

Kerisi-yi-alam Desepa Doğ Aggata Mewis

¹⁷Ham tu Mehöböp yi alam om sa bë nanër niwëk vu ham nabë ham su gwevonğ ngaa jeggin jeggin nabë sën alam dahis denevonğ lo. In su denesepa loğ ngaa anon rë, gağ kwaj nevo ngaa meris meris mu. ¹⁸Alam saga og denedo loğ malakenu, om sën su deyoh vu bë deseggi gağek medejağ degwa ni rë. Anutu vongin bë gevonğ medemedo malaj-tumsën rëğ ma gedenedo adingnë, in ayoj ni tebö in yi gesu denerağ ni rë. ¹⁹Alam dahis og su deyoh vu bë deseggi ngaa nipaya los ngaa nivesa medejağ ni rë, om sën deggerin sir yah bemedo mekwaj nevo ngaa sën maluh los avëh denevun sir in lo mu pangсэн. Log malaj anonin ngaa nipaya pin bedeneya vu pangсэн. ²⁰Rëğ Kerisi su nër bë ham gwevonğ nabë sënë rë. ²¹Ma mağ ham su ngo Kerisi yi gağek anon sën he netahu ham loğ lo rë? ²²Gağek sënë nebë ham nağah ngaa muğengsën sën ham nevonğ wirek lo vër in ham, geham gwevuu ham ayomin wirek-hen-yi na. In ngaa muğeng og nesepa loğ ngaa nipaya sën ham malamin anonin lo, genevonğ beham nimin paya nerağ. ²³Om ham ayomin mewis jağ geham kwamin bo ngaa nivesa mu. ²⁴Geham jöp gağek anon niröpsën-yi los vabuung doğ nah ham, beham natu mewis jağ benimin nabë Anutu. ²⁵Hil atu alam degwa timu om ham gwevuu gağek lahsën vun los gağek kuungsën pin na, geham nanër gağek los anon mu vu ham. ²⁶Bë ham ahëmin sengën og ham gwegin ham nivesa in ngaa nipaya rëğ gëp vu ham, gağ ham ahëmin nakul beham gwero gağek pevis gehes mala su duğ na. ²⁷In nabë nama og ham rëğ tatekin aggata vu Memö Nipaya

Satan berək kepë ham. ²⁸Log mehö sën neggodek ngaa lo, og su godek ngaa ti gökin nah. Gaq yö sero huk ti megevonq jak nema niröp in geqo monë teka jak medok vu yi, gerək dok vu mehö ngwë sën nerak vu in ngaa lo geving.

²⁹Log ham su nanër gägek jeggin jeggin berup ham avimin. Gaq ham boseq menanër gägek nivesa mu in dok vu alam sën denengo lo mesemu sir. ³⁰Anutu yi Anon Vabuung loq ya nedo ham ayomin in bë tato namugin behil ajaq ni nabë Anutu rëk geqo hil vër in ngaa nipaya nyëwewen behil anah medo geving yi. Om ham su gwevonq bAnon Vabuung ayo maggin jak. ³¹Ham su gwelë mehö ngwë paya, geham su ahëmin sengën jak, geham su gwevonq paang, geham su nanër pelësën jak mehö ngwë, geham su ahëmin nipaya vu mehö ngwë. ³²Gaq ham gwelë ham nivesa, geham dok vu ham. Log ham su kwamin bo ngaa nipaya sën mehö ngwë denevonq vu ham lo. Gaq ham kwevoh na nabë sën Anutu kwa nevo Kerisi benekevoh ham ngaa nipaya ya lo.

Hil Sepa Dok Ngaa-Rangah-Yi

5 ¹Anutu ahë neving ham beham tu nalu lo, om ham sepa dok vaha begwevonq ngaa noh vu sën Anutu nevonq lo. ²Log ham medo gwevonq ngaa los ahëmin geving mehönon pin, nabë sën Kerisi ahë neving hil beloq yah hil bed lo. Lob saga rëk natu seriveng nabë seriveng reggu nivesa sën denevesi in reggu nivesa berup na vu Anutu lo.

³Log baggëb los ngaa ningöhek sën hil navun hil in lo, gengaa nipaya sën ham ayomin nevu nevu in lo, og ham sën Kerisi-yi-alam ham lo, ham su bengwëng jak, in sagaq su yoh vu rë. ⁴Ham su nanër gägek nipaya paya berup avimin, geham su sevärin gägek kwamasën-yi, geham su nanër gägek jeggin jeggin sën su yoh vu rë lo genanöp in. In ngaa nebë saga og su yoh vu bë ham gwevonq rë, gaq ham nanër ham kwamin vesa vu Anutu in ngaa nivesa vesa pin sën nevonq vu ham lo. ⁵In ham rak ni ggovek bë mehö sën neggodek avëh avö, gemehö sën nevonq ngaa ningöhek, gemehö sën ahë neving baggëb benevonq jeggin jeggin lo, sënë nebë nesepa loq ngaa kuungsën wirek hen nebë jepö los nyëg gebus beqo arëj rak, og alam nebë sënë su deyoh vu bë dedok na Kerisi luho Anutu hir nyëg rë. ⁶Ham su gwebë nengamin vu alam sën denevonqin bë detetuhin ham beham gwevonq ngaa nipaya lo. In Anutu ahë sengën vu alam sën denekeyëh aye medenevonq ngaa jeggin jeggin nebë agi, log rëk bo nyëwewen vu sir geving. ⁷Om ham los su gwebë dok ti. ⁸In ham nedo loq malakenu wirek, rëk gwëbeng og Mehöböp nevonq beham nedo loq rangah, om ham gwevonq ngaa pin nabë alam sën denedo loq rangah lo. ⁹In alam sën denedo loq rangah lo, og denevonq ngaa nivesa mu los ngaa yohvu, gedenesepa loq gägek anon. ¹⁰Ham seggi ngaa pin bemalamin sepa ngaa sën Mehöböp ahë neving lo. ¹¹Ham noh nenga in ngaa nipaya

los ngaa malakenu-yi in su nelok vu hil rë, gaḵ ham tato rangah vu alam nabë ngaa nebë saga og nipaya. ¹²In ngaa nipaya pin sën denevonḡ vunsën lo, og hil su bengwëḡ jaḵ, in hil nid nemum in. ¹³Gaḵ ngaa pin sën neggëp rangah lo, og alam pin denelë medeneraḵ ni, ¹⁴in ngaa pin sën rangah gelu raḵ lo, og neggëp rangah rot. Nebë ḡaḡek sën dekevu meneggëp lo nebë:

“Hong sën ḡenewëp lo! Kwedi!

Gwevuu diiksën na in
lob Kerisi gevonḡ benyëḡ geheng in hongḡ
geḡemedo dok rangah!”

¹⁵Om ham gweḡin ham nivesa. Ham su gwevonḡ ngaa jeggin jeggin nabë alam kwaj masën, gaḵ ham gwevonḡ ngaa pin nabë alam los kwaj. ¹⁶Ham su basap buk na meris rë, gaḵ ham nimin wëëk megwevonḡ huk jaḵ buk pin, in ngaa nipaya neggëp lok buk sën hil nado agi. ¹⁷Om ham su gwevonḡ nabë sën alam kwaj masën denevonḡ lo, gaḵ ham kwamin bo mejaḵ ngaa sën Mehöböp ahë neving lo ni. ¹⁸Geham su nanum mekweyevin, in saga nevasap ham beham rëḵ nimin paya jaḵ, gaḵ mu Anon Vabuung napup ham ayomin og mëm. ¹⁹Ham medo gwevonḡ Anutu yi sengii los raro, gegwevonḡ tarot nivesa sën ḡadu ham ḵenumin, geham gwevonḡ raro dok ham ayomin los kwamin vesa vu Mehöböp. ²⁰Geham nanër vu Anutu jaḵ buk nabë ham ahëmin nivesa vu yi in ngaa pin sën nevonḡ benetok vu ham lo. Ham nanër nabë saga vu hil Amad Anutu jaḵ Mehöböp Yesu Kerisi arë.

Ḡaḡek Raḵ Maluh Los Venëj

²¹Log ham su gweḵo ham jaḵ vu arimin, gaḵ ham dahun ham in lob saga geḵo Kerisi arë jaḵ. ²²Log ham avëh, ham ḡurek reggamin babuj nabë sën ham nehurek Mehöböp babu lo. ²³In ham reggamin tu ham alamin menëḡin ham nebë sën Kerisi tu yi alam alaj menëḵo sir yah vu Anutu lo. ²⁴Om avëh nengaj yes vu reggaj in ngaa pin nabë sën Kerisi-yi-alam pin nengaj yes vu Kerisi lo.

²⁵Log ham maluh! Ham ahëmin geving ham venëmin nabë sën Kerisi ahë neving yi alam pin bediik lok yah bej ²⁶in bë gevonḡ benij röp los nij mewis jaḵ lo. Log neripek sir raḵ bël los nevonḡ yi ḡaḡek vu sir, ²⁷in bë denatu yi alam los nij veseek benijvesa jaḵ, genḡaa ningöhek ma ngaa nipaya su ḡëp vu sir, log mëm rëḵ gevonḡ bedenatu yi ngaa vabuung genḡaa nipaya nama na verok yi in sir. ²⁸Om ham maluh! Ham ahëmin geving ham venëmin nabë saga. Ham ahëmin geving ham venëmin nabë sën ham ngo ahëmin neving ham navimin lo, in mehöti sën ahë neving venë lo, og yö ahë neving yi. ²⁹In mehöti su ni nelëlin yö navi rë, gaḵ yö nevet yi menëḡin yi nivesa rot nebë sën Kerisi yö neḡin yi alam lo. ³⁰Kerisi neḡin hil nivesa in hil nebë yi reggos los seḵë gehil atu navi len

ti ti. ³¹Yoh vu sën Anutu yi gägek nër lo bë, “Maluh rëk gevuu ama lu ata genapiik vu venë beluhu denatu anon timu.”

³²Log gägek vunsën sënë og degwa böpata ngwë neggëp. Yönon, nenër raq Kerisi losho yi alam lo ving. ³³Rëk mu ham maluh pin, ham ti ti ngo ahëmin geving venëmin nabë sën ham ngo ahëmin neving ham lo. Log ham avëh, og ham gurek reggamin babuj.

Ġägek Raq Hurmahen Losho Amaj Lu Ataj

6 ¹Log ham hurmahen, ham huk neggëp. Ham tu Mehöböp yi alam, om ham nengamin yes vu ham amamin lu atamin megwevonğ noh vu hir gägek. ²In Anutu yi horek nër bë, “Ġëgurek amam lu atam babuj.” Lob horek saga tu ham Horek muğinsën geyi gägek semusën neggëp ving. ³Ġägek semusën sënë nebë, “Ham rëk medo nivesa meham medo hus adingsekë rot gëp dob.”

⁴Log ham alam hib, ham su gwevonğ paya vu ham nalumin lo bahëj sengën vu ham, gaq ham gweğin sir nivesa bedesepa doq Mehöböp yi gägek los degevonğ nğaa pin niröp.

Ġägek Raq Hur Losho Alaj

⁵Log ham hur, ham nengamin yes megwevonğ noh vu mehö sën tu alamin menëğin ham lo aye. Ham gönengin sir, geham ayomin na timu vu sir nabë sën ham nevonğ vu Kerisi lo. ⁶Geham su gwevonğ huk jaq malaj mu in nabë ahëj nivesa in ham, gaq ham gwevonğ nivesa vu sir, in ham tu Kerisi yi hur beham nesepa loq Anutu kwa los ayomin timu. ⁷Ham su gwevonğ huk in nabë mehönon degelë ham nivesa, gaq ham kwamin vesa megwevonğ huk los niwëek in Anutu gelë ham nivesa. ⁸In ham neraq ni vorot bë: Nabë ham gwevonğ huk nivesa geham su nimin tebö rë, og Anutu rëk gevonğ nyëvewen doq nah vu ham sën tu hur lo, gevu ham sën tu ala lo geving.

⁹Log ham sën tu ala lo, ham gweğin ham hur nivesa geving. Ham su gwevonğ paang los nanër gägek nipaya jaq sir, in ham raq ni bë ham los ham hur ham alamin timu nedo yaqek benelë ham pin neggëp ti.

Kerisi-yi-alam Nebë Alam-begö-yi

¹⁰Log arig lo, sa gägek hus sënë nebë: Ham nimin wëek menatu Mehöböp yi alam yönon! Yi mehö niwëek ata, om ham gweko niwëek vu yi. ¹¹Ham jöp Anutu yi kelenavi los nğaa sën neggërin begö lo doq na ham navimin, in ham bare niwëek gengaa sën Memö Nipaya Satan nevonğ in bë tetuhin ham lo su kepë ham. ¹²In hil su nasis begö vu mehönon rë, gaq hil nasis begö vu ggev los nğaa niwëek sën denëğin nğaa malakenu-yi lo, gevu memö nipaya sën denëğin yaqek babu lo. ¹³Om ham jöp Anutu yi kelenavi los nğaa sën neggërin begö lo pin doq

na ham, in nabë buk nipaya natök vu ham, og ham bare niwëek bengis begö rot begovek na, gemëm ham medo. ¹⁴Ham gwevëh gägek anon gëp ham balomin beham bare. Geham gwevonğ ngaa niröp mu in gërin ham newamin. ¹⁵Log ham jöp Bengö Nivesa sën nevonğ behil ayod neto revuh lo doğ na ham vahamin natu ham suu, in ham bare niwëek geham su jöpek. ¹⁶Log ham ayomin na timu vu Yesu jağ buk, lob saga natu ham kelenavi sën gërin ham navimin pin lo, in Memö Nipaya Satan yi apop sën netum daggen lo pin dejağ vu medenakul. ¹⁷Log ham kwamin bo sën Kerisi ço ham yah vu Anutu lo besaga natu ham aseeng sën ham nabun yumin doğ in gërin begö. Geham gweko gägek sën neggëp loğ Anutu-yi-kağiya lo pin in Anon Vabuung gevonğ benatu ham paëp-yu-anil beham ngis begö jağ.

¹⁸Log ham najom jağ los kwetağ vu Anutu buk geranğah, gAnon Vabuung rëğ doğ vu ham. Ham su nimin tebö! Gağ ham pasanğ najom jağ in Anutu-yi-alam pin. ¹⁹Log ham najom jağ in sa geving nabë sa bengwëng og Anutu gevonğ gägek berup saviğ besa nanër Bengö Nivesa sën neggëp kesii wirek lo nam ranğah, gesa su gönengin mehönon malaj. ²⁰Setu Bengö Nivesa sënë yi hur ti in nanër ranğah, lom deduu sa besën seyam nado karabus agi. Om ham najom jağ nabë sa su göneng in mehönon meğevuu huk sënë na, in saga og su yoh vu rë, gağ sağ nanër ranğah metatekin mena rot.

Gägek Hus

²¹Hil arid Tukikus nelok vu sa balu nehevonğ Mehöböp yi huk lob sa ahëg neving yi. Lob neyök vu ham berëğ nanër sa los ngaa pin sën netök vu sa lo ranğah vu ham bemëm ham jağ huk sën sa nehevonğ lo ni. ²²Yik sa hevong yi meyök vu ham rağ degwa sënë in bë nanër sa bengög vu ham begevonğ beham nimin wëek jağ. ²³He arimin ham, om hil Amad Anutu luho hil Mehöböp Yesu Kerisi degevonğ beham pin ayomin gëp revuh, geham ahëmin geving ham, geham ayomin na timu vu luho. ²⁴Luho degevonğ semusën vu ham sën ham ahëmin neving hil Mehöböp Yesu Kerisi rot menedo lo.